

Nuummi sanaartornikkut akit qaffakkaluttuinnartut sulisartunik akunnattumillu isertitalinnut nammakkuminaasut pillugit apeqquteqaat allaavigalugu oqallinnissamik siunnersuut.

(Inatsisartuni ilaasortaq, Doris J. Jensen, Siumut)

Akissuteqaat

(Ineqarnermut Attaveqaqatigiinnermullu Naalackersuisoq)

Naalackersuisut sinnerlugit Inatsisartuni ilaasortaq Doris J. Jensen, Siumut, Nuummi sanaartornikkut akit qaffakkaluttuinnartut sulisartunik akunnattumillu isertitalinnut nammakkuminaasut pillugit apeqquteqaat allaavigalugu oqallinnissamik siunnersuuteqarneranut qutsavigaara.

Naalackersuisuniit inissiat sanaartorneqartut qaffasissumik pitsaassuseqarlutik eqaatsumik ilusilerneqarsinnaanissaat, aammalu nutaalianik naleqquttunillu titartarneqarsimallutik inituutut misigisaqarfigilluarneqarsinnaanissaat eqqumaffigineqartorujussuuvoq. Tamatuma peqatigisaanik ineqarnermut akiliutit ingerlatsinermut aningaasartuutitut naleqqunnissaat, taamaattumillu minnerpaaffimminniitinneqarnissaat pingaaruteqarpoq. Kiisalu atortut sivisuumik atasinnaanissaat pitsaasumillu pisoqalinissaat siunnerfigineqarpoq. Atortut sapinngisamik annertunerpaamik najukkaneersuussapput aammalu najukkani suliffeqarfinit isumagineqarsinnaassallutik.

Sanaartornermut akit ineqarnermut akiliutinut, taamaalillutillu ilaqutariit ataasiakkaat angerlarsimaffimminni missingersuutaannut sunniuteqartarmata, aningaasaqarnerup annertuumik eqqumaffigineqarnissaa tamat soqutigisarivaat. Sanaartornermi kvadratmeterimut akiusut qaffasinnerunerat ineqarnermut akiliutit qaffasinnerunerannik kinguneqartariaqanngilaq, akерlianilli piffissap sivisunerusup ingerlanerani ineqarnermut akiliutit appasinnerunerannik allanngoranninnerunerannillu qulakkeerisinnaassallutik. Tamanna peqquqatigalugu Ineqarnermut Attaveqaqatigiinnermullu Naalackersuisoqarfiup inissianik atasinnaasunik, naleqquttunik nutaalianillu aammalu atasinaassuseqarluartunik ineriartortitsinermi siunnersortit, illussanik titartaasartut ingeniørillu suleqatigisani qanittumik suleqatigai.

Namminersorlutik Oqartussat kommunillu inissiaataat, Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq aqqutigalugu maleruagassiuunneqarput. Ineqarnermut akiliutit inissiap angissusai kvadratmeterinngorlugit, kiisalu illumi ataatsimoorussat tunngavigalugit naatsorsorneqartarput. Taakku saniatigut attartortup pilersuineranut tunngasut akiligassarai, soorlu innaallagissamut, imermut kiassarnermullu aningaasartuutit. Ineqarnermut akiliutit tamarmiusut uku tungavigalugit katitigaapput ingerlatsinermut akiliutit najugaqarfimmut tuttartut, aqutsinermut akiliutit inissiaatileqatigiiffimmut tuttartut aamma aningaasaatinit iluanaarutit Nunap Karsianut tuttartut.

Illumik piginnittup ukiut tamaasa ineqarnermut akiliutissat aalajangertarpai, peqqussullu naapertorlugu taakku aalajangersarneqarneranni najugaqarfiup aningaasartuutini tamaasa matusinnaassavai, taakkunungalu inissiamik piginnittup aningaasaatinit iluanaarutissaannut

aqutsinermullu akiliutinut aningaasartuutit ilaatinneqarput. Aningaasaatinit iluanaarutit illup sananeqarnerani akiusooq, illup sananeqarneranut atatillugu aningaasartuutit tamanik imaqartoq tunngavigalugu naatsorsorneqartarput, taakkunungalu pilersaarusionerq, nakkutillineq sanaartorfissagissaanerlu ilaapput.

Apeqquteqaat allaavigalugu oqallinnissamik siunnersuummi ineqarnermut akiliutit INI A/S-ip aamma Iserit akornanni assersuussinerit innersuussutigineqarput. Tassani illunik piginnittut assigiinngitsut marluk pineqarput, taamatullu illut immikkoortut assigiinngitsorujussuit marluk pineqarlutik, sananeqarnerisa ukiui assigiinngitsut, taamaalillunilu sananeqarnerannut akit assigiinngitsut. Illup pisoqaanerusup sananeqarnermini, illup nutaanerusup sananeqarnerani akiummut qaffasinnerusumut naleqqiulluni akikinnerusinnaavoq.

Naalackersuisut maannarpiq attartortitsisarnermut inatsit nutaaq, 2020-mi upernaakkut ataatsimiinnermi Inatsisartunut saqqummiunneqartussatut naatsorsuutigineqartoq suliaarat. Suliaq Namminersorlutik Oqartussat inissiaataasa kommuninut tunniunneqarnissaat pillugu suleqatigiissitami ingerlanneqarpoq. Ineqarnermut akiliutinik aalajangersaanerit maleruagassiuussinerillu, kiisalu aningaasaatinit iluanaarutit taakkulu atorineqartarnerat pillugu aalajangersakkat sulianut taakkununga ilaatinneqarput.

Isumaginninnermut Inatsisinillu Atuutsitsinermit Naalackersuisoqarfik suleqatigiissitamut suleqataavoq, taamaattumillu aamma ineqarnermut tapiissuteqartarnermut aalajangersakkat, taakkunungalu nutarterinissamut pisariaqartitsinerusinnaasut annertuumik aallunneqarput. Tamanna aamma suleqatigiissitamiit innersuussutini ersiuteqassaaq. Suliami inuiaqatigiinni innuttaasut tamarmik inissianik naleqquttunik pissarsisinnaanissaasa qulakkeerneqarnissaa siunnerfigineqarpoq.

Naalackersuisut sinnerlugit oqallilluarnissassinnik kissaappassi aammalu partiit isummersuutaasa tusarnissaannut qilanaarpunga.